

Tambah baik tiga isu asas sekuriti makanan

Oleh Prof Datuk Dr Mad Nasir Shamsudin
bhrencana@bh.com.my



Profesor Fakulti
Pertanian, Universiti
Putra Malaysia
(UPM)

Sektor makanan tanah air menghadapi cabaran besar mungkin akan berterusan selama beberapa dekad. Tidak hairanlah ia menjadi sebahagian fokus dalam Bajet 2023 terutama menyediakan makanan mencukupi untuk memenuhi pertumbuhan penduduk, peningkatan pendapatan perkapita, perubahan diet, perbandaran dan memastikan harga makanan mampu beli terutama golongan B40.

Bagaimanapun, sektor makanan merangkumi tanaman, ternakan dan perikanan belum dapat menandingi prestasi tanaman industri seperti sawit. Ini diterjemahkan ke tahap sara diri untuk makanan asas masih belum mencukupi dan perlu diimport.

Dari segi nisbah ketergantungan import (IDR) pula, pergantungan Malaysia kepada import bagi makanan meningkat kepada 13.7 peratus daripada 7.3 peratus dalam tempoh 28 tahun (1987-2015).

Pada 2020, Malaysia mengimport RM55.5 bilion produk makanan berbanding RM33.8 bilion eksport. Peningkatan terpantas dalam import berbanding eksport membawa peningkatan defisit perdagangan produk makanan berjumlah RM21.7 bilion pada 2020, kemudian meningkat 24.9 peratus.

Pada masa lalu, peningkatan pengeluaran ma-

kanaan dimungkinkan dengan penerokaan tanah pertanian dan peningkatan produktiviti. Bagaimanapun, sebilangan besar tanah produktif sudah digunakan. Oleh itu, peningkatan pengeluaran makanan pada masa depan hanya dipelopori peningkatan produktiviti pertanian.

Bajet 2023 mengambil kira isu itu untuk meningkatkan sekuriti makanan negara dari segi ketersediaan, kestabilan makanan dan kebolehcapaian.

Ketersediaan membabitkan subsidi pesawah, nelayan dan pekebun kecil sebanyak RM1.8 bilion. Ini harga padi, baja padi, benih padi sah, baja padi huma dan insentif tangkapan hasil nelayan. Selain itu, bantuan RM228 juta memberi faedah kepada 240,000 pesawah.

Mekanisme penyaluran subsidi

Bagaimanapun tiada mekanisme penyaluran subsidi ini dimaklumkan. Bagi memastikan keberkesanannya, kaedah penyaluran subsidi perlu ditukar kepada berasaskan output, bukan lagi keluasan tanah tanaman padi.

Penyisihan kawasan tanah pertanian dengan memanfaatkan tanah terbiar di bawah Kementerian Pertanian dan Industri Makanan (MAFI), FELDA, FELCRA dan RISDA khusus untuk penghasilan makanan dan sumber pemakanan lain.

Bagi memastikan ia berkesan dan berpanjangan, insentif kepada kerajaan negeri daripada kerajaan Persekutuan untuk pemuliharaan kawasan sumber

makanan negara perlu dipertimbangkan bagi memastikan kemampunan pemeliharaan dan pengelakan kawasan pengeluaran makanan.

Cuma, insentif Persekutuan kepada negeri ini tidak diambil kira dalam belanjawan tadi, sekali gus wajar dibahaskan ketika sesi perbahasan.

Pada masa sama, kita juga perlu memberikan fokus utama kepada Program Digital AgTech. Lebih banyak dana perlu diberikan dalam konteks pelaburan dan penyelidikan, selain menerima pakai teknologi sistem pertanian.

Dalam keadaan cabaran sekuriti makanan, isu kestabilan tentu perlu diberikan pertimbangan besar. Berbanding sektor perindustrian, pengeluaran makanan lebih terdedah kepada banyak lagi risiko dan ketidakpastian. Skim Perlindungan Pertanian bermula pengeluaran padi diperkenalkan amat dialu-alukan.

Bagaimanapun, pengurusan risiko pasaran juga perlu dibangunkan seperti pemantauan dan ramalan harga untuk mengurangkan risiko dalam pengeluaran makanan. Ini tidak terdapat dalam Bajet 2023.

Dalam konteks kebolehcapaian pula, terdapat banyak peruntukan dari segi meningkatkan kebolehcapaian makanan terutama bagi berpendapatan rendah. Bagaimanapun, inisiatif ini kesi-nambungan kepada apa yang sudah dijalankan sekarang. Ini akan dapat merencanakan lagi perbelanjaan isirumah, seterusnya membantu pertumbuhan ekonomi negara.